

職方典第七百八十四卷

安慶府部藝文一

論五嶽祠

晉何琦

唐虞之制天子五載一巡狩順時之方柴燎五嶽望於山川徧於羣神故曰因名山升中於天所以昭告神祇饗報功德是以災厲不作而風雨寒暑以時降及三代年數雖殊而其禮不易五嶽視三公四瀆視諸侯著在經記所謂有其舉之莫敢廢也及秦漢都西京涇渭長水雖不著祀典以近咸陽故盡得比大川之祠而正立之祀可闕哉自永嘉之亂神州傾覆茲事替矣惟潛之天柱在王略之內也舊臺選百戶吏卒以奉其職中興之際未有官守廬江郡常遣太史兼假四時禱賽春釋寒而冬請冰咸和迄今又復墮替計今非典之祠可謂非一考其正名則淫昏之鬼推其靡費則百姓之蠹而山川大神更爲簡缺禮俗頽紊人神雜擾公私奔惑漸以繁滋良由頃國家多難日不暇給草建廢滯事有未遑今元愍已殲宜修舊典嶽瀆之域風教所被來蘇之衆咸蒙德澤而神明禋祀未之或甄巡狩柴燎其廢尙矣崇明前典將俟皇輿北旋稽古憲章大釐制度俎豆牲牢祝嘏大辭

古今圖書集成
舊章靡記可令禮官作式歸諸誠簡以達明德馨香如斯而已其諸妖孽可粗依法令先去其甚俾邪正不黷

登大雷岸與妹書

宋鮑照

吾自發寒雨全行日少加秋潦浩汗山溪猥至渡沂無邊險徑遊歷棧石星飯結荷水宿旅客貧辛波路壯闊始以今日食時僅及大雷塗登千里日踰十晨巖霜慘節悲風斷肌去親爲客如何如何向因涉頓憑觀川陸邀神清渚流睇方曠東顧五洲之隔西眺九派之分窺地門之絕景望天際之孤雲長圖大念隱心者久矣南則積山萬狀爭氣負高含霞飲景參差代雄凌跨長隴前後相屬帶天有匝橫地無窮東則砥原遠隰亡端靡際寒蓬夕卷古樹雲平旋風四起思鳥羣歸靜聽無聞極視不見北則波池潛演湖脉通連葦蒿攸積菰蘆所繁栖波之鳥水化之蟲智吞愚強捕小號噪驚聒紛乎其中西則迴江永指長波天合滔滔何窮漫漫安竭創古迄今舳舻相接思盡波濤悲滿潭壑烟歸八表終爲野塵而是注集長寫不測修靈浩盪知其何故哉西南望廬山又特驚異基壓江湖峯與辰漢連接上常積雲霞雕錦繡若華夕曜巖澤氣通傳明散綵赫似絳天左右青靄表裏紫

霄從嶺而上氣盡金光半山以下純爲黛色信可以神居帝郊鎮控湘漢者也若深洞所積溪壑所射鼓怒之所廕擊湧洑之所宕滌則上窮荻浦下至猗洲南薄燕爪北極雷澱削長埤短可數百里其中騰波觸天高浪灌日吞吐百川瀉泄萬壑輕煙不流華鼎振潛弱草朱靡洪漣隴感散渙長驚電透箭疾穹溘崩聚坻飛嶺覆回沫冠山奔濤空谷礚石爲之摧碎碯岸爲之鑿落仰視大火俯聽波聲愁魄脅息心驚慄矣至於繁化殊育詭質怪章則有江鵝海鴨魚蛟水虎之類豚首象鼻芒鬚針尾之族石蟹土蚌燕箕雀蛤之儔折甲曲牙逆鱗返舌之屬掩沙漲被草渚浴雨排風吹滌弄翻夕景欲沉曉霧將濛孤鶴寒嘯遊鴻遠吟樵蘇一歎舟子再泣誠足悲憂不可說也風吹雷颿夜戒前路下弦內外望達所屆寒暑難適汝專自慎夙夜戒護勿我爲念恐欲知之聊書所覩臨塗草感辭意不周

皖山禱雨文

唐獨孤及

頃緣亢陽不雨業盛將飯以人願乞靈於神謂必盼饗過賜介福俄以浹月未蒙降衷潤礎不御觸石無望稼穡盡瘁溪澗將竭豈有悔怒將爲毒痛不然何癩我以旱使滌滌至此今元元怨咨皇帝

肝食下罪己之詔崇羣神之祀將以敬恭之懇徼福明神神其沛然迴慮驟降以雨使枯苗復生饑者得食上以應聖主乾乾之心下以副萬人顙顙之望是人性與神存云敢不以太牢少牢剛鬣翰音之薦以爲神明以報純嘏若猶涸陰蓄蘊蟲蟲如初神則不明下人將何以賴亦當撤馨香之奠寢明禋之儀祭禮興廢在此一雨

山谷寺覺寂塔碑

前人

按前志禪師號僧璨不知何許人出見於周隋間傳教於惠可大師攝衣鄴中得道於司空山謂身相非真故示有瘡疾謂法無我師故居不擇地以衆生病爲病故所至必設法度人以一相不在內外中間故必言不以文字其教大略以寂炤妙用攝羣品流注生滅觀四維上下不見法不見身不見心乃至心離名字身等空界法同夢幻無得無證然後謂之解脫禪師率是道也上膺付囑下拯昏疑大雲垂蔭國土皆化謂南方教所未至我是以有羅浮之行其來不來也其去無去也旣而以袈裟與法俱付悟者道存形謝遺骨此山今二百歲矣皇帝卽位後五年歲次庚戌某剖符是州登禪師遺居周覽陳跡明徵故事其茶毗起塔之制寔天寶丙戌中別駕前河南少尹趙郡李公常經

始之碑板之文隋內史侍郎河東薛公道衡唐相國刑部尙書贈太尉河南房公瑄繼論撰之而尊道之典易名之禮則朝廷方以多故而未遑也長老比丘釋湛然誦經於靈塔之下與澗松俱老誦先師名氏未經邦國薦與禪衆寺大律師釋澄俊同寅叶恭亟以爲請會是歲嵩丘大比丘釋惠融至自廣陵勝業寺大比丘釋開悟至自廬江俱纂我禪師後七葉之遺訓日相與嘆塔之不命號之不崇懼法象之本根墜於地也願申無邊衆生之弘誓以抒罔極揚州牧御史大夫張公延賞以狀聞于是七年夏四月上霈然降興廢繼絕之詔册諡禪師曰鑑智塔曰覺寂以大德僧七人洒掃供養天書錫命輝煥嵯谷衆庶踴躍謂大乘中興是日大比丘衆議立石於塔東南隅紀心法廢興之所以然某以謂初中國之有佛教自漢孝明始也歷魏晉宋齊乃梁武言第一義諦者不過布施持戒天下惑於報應而人未知禪世與道交相喪至菩提達摩大師始示以諸佛心要人疑而未思惠可大師傳而持之人思而未修迨禪師三葉其風寢廣真如法味日漸月漬萬木之根莖枝葉悉沐我雨然後空王之密藏二祖之微言始行於世間浹於人心當時聞道於禪師者其淺者知有爲法無非妄想深者見佛性於言下如燈之焰物朝爲凡夫夕爲聖賢雙峯大師道信其人也其後信公

以教傳弘忍弘傳惠能神秀秀公傳普寂寂公之門徒萬人升堂者六十有三得自在惠者一曰弘正正公之廊廡龍象又倍焉或化嵩洛或之荆吳自是心教之被於世也與六籍侔盛於戲微禪師吾其二乘矣後代何述焉庸詎知禪師之下生不爲諸佛故現比丘身以救濁劫乎亦猶堯舜既往周公制禮仲尼述之游夏弘之使高堂后蒼徐孟戴慶之徒可得而祖焉天以聖賢所振爲木鐸其揆一也諸公以爲司馬子長立夫子世家謝臨川撰惠遠法師碑銘今將令千載之後知先師之全身禪門之權輿王命之追崇在此山也則揚其風紀其時宜在法流某嘗味禪師之道也久故不讓其銘曰人之靜性與生偕植知誘於外染爲妄識如浪斯鼓與風動息淫駭貪怒爲刃爲賊生死有涯緣起無極如來憫之爲闢度門卽妄了真以澄覺源起迪心印貽我後昆問生禪師俾以教尊二十八世迭付微言如汝禪道膺期弘宣世溷氣滅獨與道全童蒙來求我以意傳攝相歸性法身乃圓性身本空我爲說焉如汝禪師道旣棄世將二十紀朝經乃屆皇明昭賁億兆膜拜凡今後學入佛境界於取非取誰縛誰解萬有千歲此法無壞

維長慶三年十月二十七日朝議郎守尚書禮部郎中上輕車都尉李翱謹遣舒州攝要籍司衙前軍虞候吳潭以清酒鹿脯告辭於潛山大神之靈翱自去歲來臨此邦遭罹炎旱淮左畢同鄰郡逃亡十家六空唯此舒人安業於農我政無能邁此歲凶災同報異乃神之聰事幸無敗譽斯有融遂忝帝命復官南宮皆神所祐我亦何功將赴京邑路汾大江遣使來辭神鑒予衷

舒州新堂銘

前人

先時寢壤有隘其廬乃作斯堂高嚴旗幟六角四楹裝重架虛欒拱不設簷蜚祛祛麗不越度儉而有餘左立嘉亭繚以環除延延其深肆肆其紆吏事旣退齋心以居思民之病擇弊而鉏弗逸弗墜謹終猶初大旱之後鄰邑成墟獨我州氓樂哉胥胥鬼神所福事匪在予丞相以言乃下徵書復官于朝以解前疽刻銘於斯永示羣舒

左真人仙堂記

張虛白

真人族本羣舒仙隱於潛岳代族名跡具詳碑文開元中元宗皇帝欽崇大道凡在海內山岳古之仙隱咸致禋祀天寶末兇逆攘動中原名山仙宇半爲坵墟寶應二年淮南祠祭使洞元先生諫議

大夫李抱朴真人築壇於潛岳南岡徵德行道士時修醮禮蓋遵真人之道也山巖峭嶮年代寢久
祀事墮沒而舒邑空傳真人之名遊覽者迷展敬之所開成戊午歲滎陽鄭公穀自水曹郎中出爲
舒太守敦黃老素風以清靜自化嘗因水旱小沴必齋戒告於山川之祠其徵靈如言嚮應五年秋
齊楚海嵎蟲蝗爲災將及舒境吏馳告於公公聞之懼然夙興禱於潛山之神登九天祠真人壇以
展禮守疆域者又馳告於公曰蝗雖由境旋退飛於他邑矣不食我稼穡復爲雷霆風雹斥逐飄沒
於陂池之間者不可勝數於是老幼相與歌曰鄰邑穀不登我土豐穰盛禾稼美如雲霓繫我使君
是知至仁可通於神明至德可移於災祥先是司命真君祠西廊屋壁有真人圖像不詳年代綵繪
塵侵形儀莫辨公因展禮之日謂道士尹綸曰余欲命畫工施丹青飾真人之儀形尹於是虔奉命
因搜閱圖牒知真人壇宇蕪沒於此山廡廡之前將圖永年沉吟思度俄構新意乃陳辭於公曰有
精室在廟之西欲以一室召工塑立真人於斯爲我皇牧祈福之所又建中初太守博陵崔公爲真
人立碑在廟西隅塵埃日侵籀篆訛闕業仙之子覽者墮淚欲移置仙堂公悉其請且給俸錢助其
營建虛白竊爲尹氏曰夫至道無形且爲之強然真人晦跡豈異乎今昔嘆真人闔厄魏主遭遇我

聖唐壇於李碑於崔而堂乎鄭且比夫麟鳳龜龍爲祥必俟乎碑矣碑有俟乎堂矣有其時賢以相望微三賢其孰能發揚我真人之光是歲冬十月功備尹氏乃曰我太守仁德化動天下有偏述俾余過焉乎白既詳其實故直書不文時唐開成五年五月三日記

書李伯時山莊圖後

宋蘇軾

或曰龍眠居士作山莊圖使後來入山者信足而行自得道路如見所夢如悟前世見山中泉石草木不問而知其名過山中漁樵隱逸不名而識其人此豈強記不忘者乎曰非也晝日者嘗疑餅非忘日也醉中不以鼻飲夢中不以趾捉天機之所合不强而自記也居士之在山也不留於一物故其神與萬物交其智與百工通雖然有道有藝有道而不藝則物雖形於心不形於手吾嘗見居士作華嚴相皆以意造而與佛合佛菩薩言之居士畫之若出一人況自畫其所見乎

鶴駕詞

并引

張春

潛山之有鶴駕或謂來經廬阜率以歲仲春期其至道家者類言之元豐間李公擇爲詩引可言不誣紹興己卯二月十有五有自西南來如甲馬千騎銜枚頓轡肅然而行纛途也仰而眎之

古今圖書集成
蓋所謂鶴駕者乘雲御風頡頏九霄之上先後行列悉有遐征遠引之勢俄有數千百回翔飛舞
當天之中側勢鼓翼旁射陽光色如爛銀混蕩下飭又若浪花翻白而湧江河去也稍遠益入於
寥廓不可得而見矣嗚呼神仙之事難詳也鶴駕之說如彼如余之所親見與所期之時又適相
合也如此想夫霓旌羽蓋雲飄霞馬所以參錯其中者安知非紫微秦室之貴崑閬蓬壺之仙揮
斤八極呼吸陰陽往來游覽策空浮駕而至邦人徒見鶴高蹈容與奮迅得志雄飛冥冥下陋區
中無意俯啄獨與其同類者翩躚丹漢羽翮振奮光曜觀瞻欲企而就之邈不可得而不知其亦
猶鳳凰之翔於千仞顧能下之也哉乃作送鶴駕詞曰

舒青陽之融胥兮杳楚天之混茫飛廉捲其氛翳兮鬱潛廬之相望跨長江之空闊兮來駕鶴之翱
翔勢上薄於光景兮排碧落而近紫房儼千百以爲儔兮靡先後之亂行凌九臯而奮迅兮指雲路
之攸揚俄奮翼以當天兮曜雲彩而玉光伊雄飛而冥冥兮抱長策而遐將啄芝田而飲沆瀣兮侶
千仞之鳳凰俯區中之塵滓兮肯斂羽而周章異乘軒之拘繫兮寧沙苑之見傷知出處之不可改
此度兮益駸駸而莫量惟神仙之說荒唐兮非儒生之敢詳彼道流之所傳兮謂高靈之徜徉驅鷹

準以導衛兮何拱扈之肅莊諒繽紛於伏衛兮而出於常鄉顧十洲三島之非遙兮銜胎禽以遊方
曾何必以致疑兮寔是理而悠長矚予目以將窮兮忽天回而夕陽願寄語於紫微安期之流兮墮
清音之琳瑯

大節堂碑記

元余闕

皇帝御天下之十五年念君德之不宣民生之未遂乃詔丞相更守令之法著考課之令歷練朝臣
以爲郡縣親御便殿賜之酒而論遣之於是天下之吏人奮勵以治所謂六事者以成功名稱上意
宗正郎韓君建之守安慶也獨鮮所有事其政清淨而已在官三年潁六之盜起所在奇袤之民羣
起從之殺守令據城邑時天下久平民生長不識兵革而郡縣無城郭無兵備卒然有變吏往往盜
未至而先去而城陷有不去者盜至而民不與之守城亦陷明年十一月盜入宿松破太湖潛山吏
多徙家江中爲去計君獨無徙而治城隍討軍寔以示民必守不去越明年春盜入桐城以桐人來
攻城君縱民出擊之盜敗去自二月至於九月盜之來攻者十有一大小百餘戰皆敗之盜大怒乃
悉衆而來舳艫數百里鉦鼓之聲動天地王師敗績小孤山十月癸卯盜遂北至城下城南郭久隳

爲民居而聯羣艦爲城盜縱火舟燒聯艦艦潰火入南門燒民居諸守將亦潰民恐甚走來胝君君方部署僚吏爲戰守如恆日民乃無恐且戰且撲火甲辰盜薄西郛戰却之明日薄東郛又戰却之相火所經撤民屋材夜柵之旦甲寅盜力攻無得利諸潰者聞城完且相率來援盜望見之乃夜引去余來戍郡道聞城陷矣比至乃完問故父老皆曰韓君完我君時亦去則民無與爲守民無與爲守則城之完不完蓋未可知矣方朝廷更化時吏皆黼藻其政以角一日之能君若無能然者及臨大變其所能者乃若人之所未易能君誠不可以小知也余觀於今南方之國不頻盜非其所力致有能守者矣而頻盜者爲難頻於盜徼幸於一勝有能守者矣而屢勝者爲難民屢勝矣至於敗且危於是不去而上效死以保其下下效死以衛其上卒能因敗爲功以危爲安如君之爲者蓋千百之十一此人之所難能也曾子所謂臨大節而不可奪者君其人歟郡所治屬縣六西至於懷寧又西至於灊山又西至於太湖武夫義民列砦相望百戰抗盜賴君以爲根本而無叛意東至於池又東至於姑孰數郡之民賴君以爲藩屏而無死傷之禍君之所完不旣大矣哉余抵郡十日盜復大至與君率衆殲之盜不至者今再期矣十四年春三月朝廷錄十月功特加君中奉大夫秩從三品

幕官以下各升秩有差余因名其廳事曰大節之堂所以揚君之懿於無窮也雖然治之有亂猶旦之有夜也後之人坐其堂而思其人而懼其時有不協於其行不完於其民者獨不欲然於君者乎余之名堂又所以勸於無窮也君字公懋遼西人

潛岳禱雨文

前人

具官余闕謹告於南岳潛山之神曰凡列於天地之間者吏食君祿以治其爭訟神享君祀以禦其灾患無非事者也自盜之興同安之民農失其業商失其資吾日夜憂所以圖利之安集之以思報君食然自去歲以來苗田屢旱雨澤失時百姓饑死此則非吏之所能爲而神之責也夫所謂神者以聰明正直能福善禍淫者也昔者兇盜燔爾宮廟毀爾粢盛而吾民抒忠義以殄滅之而神乃禍民而福盜所謂福善禍淫者安在吏或不職以愆天和神乃降灾於民而不降灾於吏所謂聰明正直者安在夫羣神雖舉各有攸職能興雲致雨者惟山川之神耳爾神受命作岳司命之寄在東北西三神之上又吾同安封內之神也水旱之責不於汝而奚歸今白露將近雖雨無及茲與神期三日大雨田禾成熟將率吾民修爾宮殿奉爾祭祀不然將與民圖變置汝其無悔

余忠宣公死節記

賈良

有元設科取士中外文武著功社稷之臣歷歷可紀至正辛卯兵起淮潁城邑盡廢江漢之間能捍禦大郡全盡名節者守舒帥余公廷心一人而已公家世河西自擢高科登要職以掾東兗憲來鎮舒郡始至舒時國門之外數十里之地皆盜柵也公身率壯士累戰而勝盜遂退乃爲攘剔傍近之地令民耕之六築城壘修矛戟募士以圖克復癸巳秋國朝命太師右丞相脫脫征討江漢使至舒公卽奉命率兵出境戰潰羣寇遂平樅陽盜柵維時湖廣陳友諒據上流雙刀趙據池陽公集常戰艦數百艘借糴江西往來皆爲二寇邀遮然與戰無不克捷或誘至城下而設奇俘獲尤多盜爲股栗慨嘆舒屬六邑皆爲盜所據民有逃亡至郡者乏絕糧餉公捐祿米二百石以賑恤民乃安凡盜至民亦爲力戰時予自閩海還舒謁公於館下公延門塾俾教授子弟翌日侍公於城之南樓語及國家顧謂予曰余荷國恩以進士及第歷省居館閣每愧無報今國家多難授予以兵戎重寄豈余所堪然古人有言爲子死孝爲臣死忠萬一不幸吾知盡吾忠而已丁酉冬十月上流陳寇至郡城圍及兩月公累出奇兵以戰陳寇死者甚衆其屬邑逃難之民悉思効義以報且戰且守盜兵遂弱

城柵益堅盜思不能獨勝乃會趙雙刀水寇上下交攻戰艦萬艘聲鼓震動砲石鏗鏘公勵將士民亦無懼色十一月趙寇急攻城南門陳寇攻城東門戰數十合士氣頗怠公注甲於城東之練樹灣有二寇挑戈度壕來戰公持刃躬自殺之俱墜死於壕池一賊又登岸公復奮兵急殺之陳寇望而嘆曰詩書之帥有如是乎使天下皆余公也何患城守之不固哉有頃諸將復集皆愧私相謂曰元帥躬自奮勇吾生何爲皆踴躍思戰陳寇見兵勢復盛遂皆退十二月趙寇復攻城東公誓將曰今城守孤危汝等當爲國宣力有功當以吾爵授汝不然則戮以殉將士受命亦皆以死自效血戰至暮兵稍不利公被矢傷其左目神思昏惑將士遂衛公還暨至閩內甌而驚愕謂左右曰全忠報國吾分內事使吾死得其地吾瞑目無憾汝奚以我歸耶於是將士復衛公出戊戌春正月盜整兵大合舳艫延互旗幟鏖鏖公率將士及城之居民戰於城西門力敵至午城遂陷公北面仰天嘆曰吾守孤城七年今兵疲力竭不能滅寇雪恥恨願以死報國乃拔劍自刎墮壕西清水灣而死陳氏以金購求得之具棺槨衣衾葬於城外公之夫人蔣氏聞公仗節卽率女安安竟赴井死長子名得臣時年十八能熟記諸經書慟曰吾父死於忠吾何以生爲乃溺死於後園之深池甥名福童壽戰有

勇力亦戰死於城壕之間煙嬌花李爲義兵萬戶自城外馳單騎回其家人勸之降李怒曰吾受元帥節制平日甘苦元帥與吾共之元帥已死吾降異日何以見元帥於地下且曰爾等亦當隨吾盡忠毋爲人所魚肉乃盡驅之一室大小咸殲殺然後坐取巨觥以飲拔劍自刎而死賊衆入見斷其首而去其餘將士若萬戶紀首忠金勝宗鎮撫陳彬千戶那海經歷段玉等俱不肯降咸戰死於鋒鏑之下噫自古天下有盛必有衰然以予觀之三代而下漢唐及宋未有如元運之盛者奈何承平日久武備不修一旦兵起淮漢爲臣子者或擁兵自衛或望風而降於是中原失守而忠臣義士幾何人斯稽之史冊自古忠烈烜赫者唐巡遠宋文天祥而已若吾余公廷心鍾光岳之靈氣有文武之全才方氣運之盛黼黻大猷煥然可述當多難之秋戰守之功鮮有儷者及夫援絕城陷竟能秉節不屈視死如歸尤人之所不能及然公之忠節固職之所當爲而公之夫人若子若女一門之節義又世之所無者余素居公之館下凡公之政績不及枚舉而公之大節敢不紀之以傳之後故爲之記乃贊曰於赫元運篤生名臣識綜今古學究天人捍此大邦戎備整飭允文允武克著厥績古有巡遠公實邁之猗與忠節敢揚頌詩至元戊戌八月